



Broj:02-04-256/22

Datum, 28.02.2022.godine

ZAPISNIK

sa 14. redovne sjednice 7. saziva Općinskog vijeća Doboj Istok

Četrnaesta redovna sjednica 7. saziva Općinskog vijeća održana je dana 24.02.2022. godine u zgradi općine Doboj Istok u Klokočnici sa početkom u 10,00 sati.

PRISUTNI: 17 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Sulejman Delić, pomoćnik općinskog načelnika za civilnu zaštitu, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Lejla Ragibović – Hadžić, općinski pravobranilac, te predstavnik RTVTK.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „Uvaženi načelnice sa saradnicima, kolege i kolegice, vijećnici, predstavnici medija esalamu alejkum i dobar dan. Otvaram 14. redovnu sjednicu 7. saziva Općinskog vijeća Doboj Istok. Molim tehničkog sekretara da utvrdi broj prisutnih na današnjoj sjednici. Znači, prisutno je svih 17 vijećnika.“

USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste zapisnik sa prethodne 13. redovne sjednice 7. saziva Općinskog vijeća Doboj Istok. Ima li neko primjedbu? Nema. Ko je za usvajanje zapisnika?

Glasanje: ZA – 17, PROTIV – 0, UZDRŽANIH – 0.

Također ste dobili zapisnik sa 2. hitne sjednice 7. saziva Općinskog vijeća Doboj Istok. Ima li neko primjedbu? Nema. Ko je za usvajanje zapisnika?

Glasanje: ZA – 17, PROTIV – 0, UZDRŽANIH – 0.

VIJEĆNIČKA PITANJA

Selmin Karić, predsjedavajući Općinskog vijeća: „ Ima li neko pripremljeno vijećničko pitanje? Nema.“

USVAJANJE DNEVNOG REDA

Selmin Karić, predsjedavajući Općinskog vijeća: „ Dobili ste prijedloge za proširenje dnevnog reda. Trebaju li neka dodatna pojašnjenja? Ne treba.

Prijedlog za proširenje dnevnog reda. U skladu sa članom 56. Poslovnika o radu Općinskog vijeća Doboj Istok predlažem da se u dnevni red Općinskog vijeća stave sljedeće tačke:

1. Razmatranje i usvajanje Prijedloga Odluke o sprovođenju ankete o zadovoljstvu građana
2. Razmatranje i usvajanje Prijedloga Odluke sprovođenju redovnog godišnjeg anketiranja.

Obrazloženje: Razlog za proširenje dnevnog reda je što smo u MEG projektu općinskog okolišnog upravljanja i dužni smo da što hitnije obavimo anketiranje o zadovoljstvu građana, imenujemo osobe koje će provoditi anketu, te da Općinsko vijeće razmatra izvještaj o sprovedenoj anketi i da utvrdi validnost obavljene ankete.

Imamo još jedan prijedlog za proširenje dnevnog reda.

U skladu sa članom 56. Poslovnika o radu Općinskog vijeća Doboj Istok predlažem da se u dnevni red Općinskog vijeća stavi sljedeća tačka:

Razmatranje zahtjeva za oslobađanje godišnje komunalne takse Udruženja poslodavaca ugostiteljstva u općini Doboj Istok.

Obrazloženje: Udruženje poslodavaca ugostiteljstva u općini Doboj Istok podnijelo je zahtjev za oslobađanje godišnje komunalne takse iz razloga što se u zadnje dvije godine nalaze u veoma teškom položaju, a uzrok je pandemija COVID – 19, povećanje repromaterijala i dr.

Ko je za da se tačka Razmatranje i usvajanje Prijedloga Odluke o sprovođenju ankete o zadovoljstvu građana uvrsti na današnji dnevni red?

Glasanje: ZA – 17, PROTIV – 0, UZDRŽANIH – 0.

Ko je za da se tačka Razmatranje i usvajanje Prijedloga Odluke sprovođenju redovnog godišnjeg anketiranja uvrsti na današnji dnevni red?

Glasanje: ZA – 17, PROTIV – 0, UZDRŽANIH – 0.

Ko je da se tačka Razmatranje zahtjeva za oslobađanje godišnje komunalne takse Udruženja poslodavaca ugostiteljstva u općini Doboj Istok uvrsti na današnji dnevni red?

Glasanje: ZA – 17, PROTIV – 0, UZDRŽANIH – 0.

Za današnju sjednicu predlažem sljedeći dnevni red:

- 1. Razmatranje i usvajanje prijedloga Odluke o utvrđivanju uslova, kriterija i postupka dodjele stipendija redovnim studentima dodiplomskog studija*
 - 2. Razmatranje i usvajanje prijedloga Odluke o visini prosječne konačne građevinske cijene 1 m² korisne površine građevinskog objekta na području općine Doboj Istok za 2022. godinu*
 - 3. Razmatranje i usvajanje prijedloga Odluke o izmjeni Kodeksa ponašanja izabranih zvaničnika – vijećnika u Općinskom vijeću Doboj Istok*
 - 4. Razmatranje i usvajanje Izvještaja o radu Zajedničkog pravobranilaštva Čelić i Doboj Istok za 2021. godinu*
 - 5. Razmatranje i usvajanje Izvještaja o rješavanju upravnih stvari u upravnom postupku u općini Doboj Istok za 2021. godinu*
 - 6. Razmatranje i usvajanje Izvještaja o radu Komisije za utvrđivanje prometne vrijednosti nepokretnosti i prava za 2021. godinu*
 - 7. Razmatranje i usvajanje Prijedloga Odluke o sprovođenju ankete o zadovoljstvu građana*
 - 8. Razmatranje i usvajanje Prijedloga Odluke sprovođenju redovnog godišnjeg anketiranja*
 - 9. Razmatranje zahtjeva za oslobađanje godišnje komunalne takse Udruženja poslodavaca ugostiteljstva u općini Doboj Istok*
- Dnevni red dajem na diskusiju. Ima li prijavljenih? Nema. Ko je za ovakav dnevni red?*
- Glasanje: ZA – 17, PROTIV – 0, UZDRŽANIH – 0.*

REALIZACIJA DNEVNOG REDA

- 1. Razmatranje i usvajanje prijedloga Odluke o utvrđivanju uslova, kriterija i postupka dodjele stipendija redovnim studentima dodiplomskog studija**

Selmin Karić, predsjedavajući Općinskog vijeća: „Dobili smo amandman. Ima li potrebe da predlagač pojasni? Nema. Ko je za usvajanje ovog amandmana?

Glasanje: ZA – 17, PROTIV – 0, UZDRŽANIH – 0.

Otvaram diskusiju po ovoj tački s tim da je i ovaj amandman postao sastavni dio Odluke“

Emira Karić, predsjednica kluba vijećnika SDP: „Selam alejkum i dobar dan. Što se tiče ove tačke dnevnog reda iščitala sam baš doslovno ovu odluku. Smatram da je jako dobra odluka, jer su se

iskristalizirale neke stvari, pa čak bi i pohvalila neke članove ove odluke kao npr. član 7. koji djeluje itekako motivaciono. Obrazložit ću i zašto. Ako pogledamo prosjek ocjena od 8,5 do 8,99 – 50 bodova, a prosjek ocjena od 6 – 7 je 10 bodova. Znači taj prosjek ocjena od 1 bod ili bod i po zapravo pruža dobru lepezu studentu koji aplicira na ovu stipendiju. Šta želim da kažem? Nije ista ocjena 7 i ocjena 8,5. Itekako se iza ocjene 8,5 jedan kvalitet znanja može pretpostaviti, a evo i sa ovom odlukom hajmo reći da se nagrađuje. Što se tiče samog amandmana, pošto sam ga prihvatila imam pravo i diskutovati, ja podržavam ovakve amandmane, a ovo je zapravo izvađeno iz člana federalnog zakona. Moglo je biti, a moglo je i ne biti, jer ti možeš ići na tumačenje preko čitanja tih određenih zakona, ali ja sam uvijek za da u samoj odluci bude i samo tumačenje. Jako mi je čudno u cijelom našem sistemu, da li bili pravilnici na bilo kojim nivoima, kada kaže bit će tumačenje pravilnika. Šta će mi tumačenje pravilnika, de napravi pravilnik, pa mi ga istumači dobro i da ja čim uzmem pravilnik znam o čemu se ovdje radi. Imali smo sličnih problema u prosvjeti vezano za ovo što je kolega Amir predložio kao amandman, pa bilo ko od nas kada naiđe na ovakve stvari bilo bi jako poželjno da putem amandmana to i uradi.“

Selmin Karić, predsjedavajući Općinskog vijeća: „ Zahvaljujem se kolegice. Ima li još prijavljenih? Nema. Dajem na izjašnjavanje. Ko je za usvajanje prijedloga Odluke o utvrđivanju uslova, kriterija i postupka dodjele stipendija redovnim studentima dodiplomskog studija?“

Glasanje: ZA – 17, PROTIV – 0, UZDRŽANIH – 0.

2. Razmatranje i usvajanje prijedloga Odluke o visini prosječne konačne građevinske cijene 1 m² korisne površine građevinskog objekta na području općine Doboj Istok za 2022. godinu

Selmin Karić, predsjedavajući Općinskog vijeća: „ Imate stav komisije. Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, UZDRŽANIH – 0.

3. Razmatranje i usvajanje prijedloga Odluke o izmjeni Kodeksa ponašanja izabranih zvaničnika – vijećnika u Općinskom vijeću Doboj Istok

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, UZDRŽANIH – 0.

4. Razmatranje i usvajanje Izvještaja o radu Zajedničkog pravobranilaštva Čelić i Doboj Istok za 2021. godinu

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, UZDRŽANIH – 0.

5. Razmatranje i usvajanje Izvještaja o rješavanju upravnih stvari u upravnom postupku u općini Doboj Istok za 2021. godinu

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, UZDRŽANIH – 0.

6. Razmatranje i usvajanje Izvještaja o radu Komisije za utvrđivanje prometne vrijednosti nepokretnosti i prava za 2021. godinu

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, UZDRŽANIH – 0.

7. Razmatranje i usvajanje Prijedloga Odluke o sprovođenju ankete o zadovoljstvu građana

Selmin Karić, predsjedavajući Općinskog vijeća: „ Tačku dajem na diskusiju.“

Emira Karić, predsjednica kluba vijećnika SDP: „ Itekako mi je drago što je danas kao tačka dnevnog reda Odluka o sprovođenju ankete o zadovoljstvu građana i sljedeća tačka gdje će to biti, hajmo reći, godišnja praksa. Ovo je itekako trebalo prije, možda, 5, 10 ili 15 godina uvesti u neku praksu, jer jednostavno takve ankete mijenjaju kurs ukoliko smo željni da promijenimo kurs u načinu djelovanja da li naših preduzeća ili infrastrukturnih stvari. Ono što bih ovdje napomenula to je član 2. gdje kaže anketa je validna ako obuhvati 3% građana upisanih u opći birački spisak. Dobro, znači imamo uzorak od 3%, a populacija je svi građani upisani u birački spisak i zaista može 3% uzorka, da kažemo, dati određenu hipotezu, potvrditi ili je odbiti. Zanima me na koji način će i ovih 3%, jer nije razjašnjeno i vjerovatno će ta komisija razjasniti, da li će to ići po mjesnim zajednicama, da li će se obuhvatiti ravnomjerno godišta naših građana, da li ćemo i ovaj džender u anketi obuhvatiti. Mislim da su to stvari koje anketu čine boljom. Kada zaista razmislimo o uzorku ići ćemo nasumice to određivati i to puno znači. Moje preporuke su da se i tih 3% ozbiljno odredi po određenim kriterijima ko će pristupiti toj anketi. Što se tiče samog upitnika anketnog listića on je dobar, dosta je obuhvatio stvari i moram biti iskrena da oni koji se budu anketirali morat će pozorni biti u svim ovim pitanjima ukoliko im je stalo da kvalitetno odgovore. Možda na pitanje 13, 14 i 15. po meni nije dobra formulacija da li ste zadovoljni radom Doma zdravlja, radom vrtića. Mislim da je trebalo radom, pa sve šta ulazi u taj rad, jer dosta građana može biti nezadovoljno jednim doktorom i da se to pitanje odnosi na to što ja nisam zadovoljna tim doktorom i vršenjem njegovih usluga. Možda treba dodati još u zagradi šta se sve smatra rad Doma zdravlja, rad vrtića, Centra za socijalni rad itd. Ostalo kako je prva anketa dobra su pitanja ovog anketnog listića i vidimo da su dobre mogućnosti odgovaranja, jer ima vrlo zadovoljni, zadovoljni, neutralni, nezadovoljni, vrlo nezadovoljni što znači da puno stepena ima i da će malo to teže biti obraditi statistički, ali pravi statističar dat će nam dobre smjernice i rezultate. Isto tako bilo bi dobro da Općinsko vijeće bude upoznato sa analizom te ankete.“

Selmin Karić, predsjedavajući Općinskog vijeća: „ Mi po ovoj odluci i radimo analizu, a kada je u pitanju 3% to se odnosi na svaku mjesnu zajednicu onako kako u odluci stoji. Znači 3% u svakoj mjesnoj zajednici onih koji su na općem biračkom spisku. Ima li prijavljenih? Nema. Ko je za usvajanje Odluke o sprovođenju ankete o zadovoljstvu građana?“

Glasanje: ZA – 17, PROTIV – 0, UZDRŽANIH – 0.

8. Razmatranje i usvajanje Prijedloga Odluke sprovođenju redovnog godišnjeg anketiranja

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, UZDRŽANIH – 0.

9. Razmatranje zahtjeva za oslobađanje godišnje komunalne takse Udruženja poslodavaca ugostiteljstva u općini Dobroj Istok

Selmin Karić, predsjedavajući Općinskog vijeća: „ Tačku dajem na diskusiju.“

Emira Karić, predsjednica kluba vijećnika SDP: „ Ja ću morati biti iskrena nakon nekih neugodnih vijesti sinoć i tokom jutra meni se raspoloženje popravilo na ovoj sjednici glede ovog anketiranja i glede ovog amandmana, jer me takve stvari ispune i daju mi motiv da idem i radim što bolje u svom životu. Tako i ova tačka dnevnog reda, jer mi je stvarno drago da su se poslodavci ugostitelji odlučili za to udruženje. To je način na koji dobivaš određene stvari i za koje se boriš jednom riječju. Zaista mi je drago što je 21.01. održana ta osnivačka skupština Udruženja poslodavaca i nadam se da će dobro raditi i da će kvalitetno raditi. Vidimo da ih ima ukupno 18 u tom udruženju što je dobar broj za našu općinu. Što se tiče njihovog prijedloga ja ću se u potpunosti složiti sa tim prijedlogom. Mislim da je to mali znak dobre volje nas vijećnika u Općinskom vijeću, jer vidim da se na svim nivoima zaista pomaže da li kroz projekte, da li upravo kroz

ovako neke odluke. Mislim da neće puno oštetiti budžet i bilo bi dobro da jednoglasno podržimo ovu tačku dnevnog reda.“

Mehmed Mehinović, vijećnik SBiH: „ Gospodine predsjedavajući, dopredsjedavajući, izvršna vlast, pravobranioče, sve vas lijepo pozdravljam i selamim. Da ne bi, kako dopredsjedavajući reče, završili za 15 minuta Vijeće, pa da ga malo odužimo i zato mi dozvolite da malo više pričam. Nisam se javljao na prethodnim tačkama, jer imam problema sa grlom, međutim pošto mi je o materija jako poznata htio sam samo da neke dileme otklonim. Sve ove prethodne tačke zaista su dobre za građane Doboj Istoka i svi smo ih jednoglasno podržali i tu nije bilo dilema. Kako imam običaj reći ovim odlukama se diže level života građana Doboj Istoka, demokratizacija i svašta nešto. Naravno, da iskoristim priliku da pohvalim izvještaj pravobranioca kojeg sam dobro pročitao i prezentovana je situacija jako fino. Kada se radi o ovoj odluci, to nije baš tako jednostavno, ali odmah da kažem da ću ja ovo podržati, tu nema dileme, s obzirom da znamo kakva je situacija u budžetu, da je situacija jako dobra i da na neki način dio para treba vratiti građanima i našim privrednicima. Obično kod ovakvih odluka traži se mišljenje izvršnog organa, stoje li oni iza toga i je li sve u redu i da mi to možemo podržati. Tako treba da bude kada se stavlja na dnevni red, ali čim su predali smatram da je sve kako treba i da je to u redu. Ja ne znam da li smo mi zakasnili, a privrednici i računovođe bolje znaju od mene, jer se do 28. podnosi i komunalne takse naplaćuju u martu mjesecu i planirano je tako u budžetu. Da li smo zakasnili ili nismo želio bih da mi neko kaže, jer je očito da će ovo biti udar na budžet i o tome je trebalo da se izjasni komisija za financije, trebalo je i zakonodavno pravna komisija da se izjasni o ovom dokumentu, ali i ne mora. Ovo je u nadležnosti Općinskog vijeća i mi možemo donijeti odluku nikakav nije problem, ali sam htio nekoliko nejasnoća da razjasnim. Da li smo mi zakasnili obzirom da se do 28. a to znate vi koji radite na tim poslovima da se moraju predati obračuni i da se komunalna taksa naplati u 100% iznosu kako smo mi planirali u budžetu tokom mjeseca marta. Imamo izvanrednu Poresku upravu koja to prati i ako je sve to ok ja ću podržati naravno, jer ovo nije neki iznos, a na neki način smo pomogli naše privrednike sa 50 – tak zaposlenih i dali smo im neka krila. Ova odluka ima opravdanje i da svi jednoglasno podržimo ovu odluku.“

Kemal Bratić, općinski načelnik: „ I ja bih poslao i pozdravio sve uvažene vijećnice i vijećnike, našu pravobraniteljicu, medije i zaželio bih vijećniku Mehmedu brz oporavak pošto znam da je bolestan i da što prije ozdravi i da se vrati životnim aktivnostima kao i svi mi ostali. Ja ću reći svoje mišljenje i nadam se da me neće neko krivo shvatiti. Ovo sam kandidirao na dnevni red iz jednog jedinog razloga da neko ne bi rekao da ja nisam kandidirao i da vi niste raspravljali. Reći ću šta mislim o ovome, jer razgovarao sam i sa Poreskom upravom i sa onim koji to bolje znaju i znaju da to baš i ne može ovako. Zna se da bi morali ići u izmjenu Odluke o komunalnim taksama, a to je jedan proces i to nam je sugerirao i šef Poreske uprave. Dijelim mišljenje sa prethodnim diskutantima da je ta grana vjerovatno najviše pogođena ovom pandemijom. Imali su raznoraznih pravila, te dva metra, te potvrde, te ovo, te ono i cijenim da im trebamo pomoći, ali možda ne na ovaj način. Prije mene je neko rekao da je to za nas mala svota i da to neće oštetiti općinski budžet, ja mislim da to njih neće Bog zna obogatiti, niti će popraviti njihovo stanje, ali ako će to njima na neki način pomoći, ja sam spreman da nađemo načina, ako Općinsko vijeće naravno donese odluku da li ćemo raspisati poziv ili ćemo tražiti dostavu podataka. Ono što znam je da je 99 % ovih naših ugostitelja dobilo određene naknade sa viših nivoa za plate i za doprinose. Znam samo da jedna nije, jer je bila neka preregistracija, pa smo mu na neki način uskočili mi u pomoć. Koliko znam njihova taksa je 200 KM i nije problem sve što Vijeće donese ja sam spreman, pa neka to bude i iz budžetske rezerve mada je to moje nekakvo diskreciono pravo ili iz ostalih nepredviđenih troškova, jer imamo tu stavku u budžetu gdje možemo pomoći. Ja sam za to da im pomognemo, ali ne na ovaj način. Takse su većinom i uplaćene, jer me je šef Poreske ispostave obavijestio da je krajnji rok 28.02. odnosno 15. mart i mi možemo izaći u susret našim obrtnicima koji se bave ugostiteljstvom. Pouzdano znam da su svi u veoma teškoj situaciji i imao sam sa njima sastanak prije osnivanja ovog udruženja gdje su iznijeli određene probleme vezano za ograničavanje radnog vremena, vezano za broj gostiju koji smije da prisustvuje objektu itd. Sve što vi ovdje dogovorite ja ću gledati da to sprovedem, ali moramo naći zakonski način da pomognemo našim obrtnicima koji se bave ugostiteljstvom. Zašto nisam za oslobađanje komunalnih taksu, mislim da to nije u skladu sa zakonom, jer otvorit ćemo proces. Imali smo nedavno zahtjev Udruženja stomatologa da ih oslobodimo komunalne takse što je smiješno, jer mislim da oni nisu bili oštećeni kao naši ugostitelji. Sutra će nam još neko drugi podnijeti zahtjev, a nismo mi policija niti Poreska uprava da istražujemo kako je ko poslovao, ali svi znamo da su ovi ljudi bili u veoma teškoj poziciji. Vidimo pad u Sarajevu i Mostaru koje isključivo živi od tog ugostiteljstva i turizma, a na našu sreću mi nemamo toliko tih otvorenih objekata, jer bi vjerovatno imali i veće probleme. Oni zapošljavaju oko 50 ljudi i mislim da im trebamo pomoći. Nadam se da ste me dobro shvatili, nisam

protiv toga, ali jesam protiv oslobađanja takse, jer je to duga procedura da bi ih oslobodili komunalne takse. Evo da Vijeće donese jedan zaključak da načelnik iznađe mogućnost da sa njima održimo sastanak i da vidimo kako ćemo i na koji način pomoći.“

Hasan Hasančević, predsjednik kluba vijećnika SDA: „ Uvaženi prisutni esalamu alejkum i dobar dan. Pošto se mi znamo sa ugostiteljima oči u oči jedni su dobili na viber ove zahtjeve, a jedni nisu i mislim da je vrijeme koje predlažu nije adekvatno. Načelnik je kazao što je kazao i kolega Mehinović i ja predlažem sljedeće: da svi oni koji uplate, a pripadaju ovom ugostiteljskom udruženju da im načelnik nađe za shodno da im se vrate da sredstva, da izbjegnemo te pozive. Znači da mi kao Vijeće donesemo zaključak da oni koji uplate taksu sa 28.02. da podnesu zahtjev načelniku ili službi da se to isplati iz određenih sredstava. Nisam za to da se to daje iz budžetske rezerve, jer ima drugi način sa drugog koda da se prebace sredstva. Ako je 200 KM i ako je navedeno njih 17, to je 3400 KM i to neće puno oštetiti, ali ako će njima pomoći slažem se da na ovakav način vratimo sredstva koja su plaćena. Da sada ne bi ulazili u postupke je li zakonito ili nije, a nismo na vrijeme dobili zahtjev, pa ćemo ići sa ovim da im vratimo uplaćena sredstva i mislim da bi svi trebali biti zadovoljni.“

Emira Karić, predsjednica kluba vijećnika SDP: „ Naravno da sam za da sve ide pravno i zakonito, ali da se nađe način i time pokaže dobra volja Općine u rješavanju ove problematike. Ne tjeram mak na konac, ali ko god ovdje iznese prijedlog nekog zaključka ja želim da to bude precizno i jasno kako bih znala za šta dižem ruku. Ako ste rekli da ne može iz rezerve, a može sa ovog konta, onda da se isprecizira onako kako se i opoziciji traži kada je u pitanju amandman da sve bude tačno, precizno i jasno kako bi vi bili upućeni. Znači, hajmo od ove tačke napraviti malo dužu tačku dnevnog reda i zamolila bih općinskog pravobranioca da nam iznese svoj način i svoj zaključak, jer mislim da je ovdje najeduciraniji kada je ovo u pitanju. Odnosno da nam naprosto taj zaključak jasno definiše da ne bi bilo šta bi bilo ako bi bilo, da znamo otprilike na šta se šta odnosi i na koji način da kada izađemo iz ovog objekta možemo prenijeti na određene upite. Kolega Mehinović ja bih se i na to osvrnula da to treba ići kroz komisiju itd. Mi smo mala lokalna zajednica i svi mi otprilike znamo koliko je tih privrednika, koji je to iznos tako da se možda može izbjeći taj način zbog te male lokalne zajednice, ali kada vidimo na višim nivoima da se usvoji inicijativa 1000 KM porodiljama, pa fino Vlada 43 miliona mora znati odakle i niko nije na sjednici kada je usvojena inicijativa pao u nesvijest što se mora 43 miliona ili evo sada će nam se povećati plate za 10,5 % i neće ova Vlada da padne u nesvijest odakle će to dobiti. Tako i ovaj iznos koji nije toliko visok za ovaj budžet i može se naći načina samo da nam se tačno kaže zaključkom šta će biti, kada će biti i koliko će biti.“

Kemal Bratić, općinski načelnik: „ Ja sam bio jasan da Vijeće donese zaključak da se načelnik obaveže da nađe način, a ne sada da to tumači pravobranioc ili sekretar. Mi imamo stručne službe koje će načelniku reći kako da mi pomognemo našim privrednicima. To je najbolji zaključak da vi mene obavezete da sprovedemo tu odluku, a vi ćete naravno dobiti poslije izvještaj kako ćemo mi to uraditi, da li će to biti poziv ili će biti na neki drugi način. Ono što znam jeste da načelnik može donijeti samostalnu odluku iz budžetske rezerve da da subvenciju našim ugostiteljima.“

Izet Hodžić, zamjenik predsjedavajućeg Općinskog vijeća: „ Poštovani predsjedavajući, uvažene kolege vijećnici i vijećnice, poštovani načelnice sa saradnicima, općinski pravobranioče, sredstva informisanja koristim priliku pošto se prvi puta javljam da vas sve srdačno i iskreno poselamim i pozdravim. O ovoj tački dnevnog reda ono što sam želio reći kolega Hasan Hasančević mi je uzeo riječ i ja sam za ovakav zaključak otprilike. Čak i cijenim da trebamo u konačnici po ovoj tački dnevnog reda da donesemo odluku ili zaključak koji će biti sprovediv, odnosno koji će biti obavezujući. Ja imam ovdje u ovom dopisu 17 potpisnika, odnosno 17 ugostiteljskih objekata i imam dilemu sam sa sobom zbog kratkoće vremena da pročitam materijale da li mi na području općine Doboj Istok imamo još ugostiteljskih objekata koji nisu obuhvaćeni ovim, jer možda imamo ugostitelja koji ne žele da budu članovi ovog udruženja. Kažem nisam siguran da li su svi ugostiteljski objekti koji su registrovani za ovu djelatnost na području općine Doboj Istok obuhvaćeni, ali ako jesu super je i u redu. Ako nisu smatram da bi ostali ugostitelji, odnosno ugostiteljske radnje koje nisu članice udruženja trebale da koriste ovu priliku. Ja ću ponoviti ono što je kolega Hasan rekao zakonom je predviđeno do 28. februara da privredni subjekti i obrtničke radnje i sve ostalo podnesu prijavu za komunalnu taksu. Oko 10 dana od podnošenja prijave dužni su istu uplatiti na račun Općine Doboj Istok. Ja se slažem da ovo što je Hasan rekao da vlasnici ugostiteljskih radnji koji su uplatili ovu komunalnu taksu da im se shodno našem zaključku koji donesemo, a obavezu da preuzme Općinski načelnik iz koje stavke budžeta će to da uradi. Znači da kažemo da im se u što kraćem roku, možda 10 – 15 dana izvrši povrat

sredstava, ne povrat, ne znam kako ćemo mi to definisati. Da li će to biti pomoć u radu ove djelatnosti privrede u iznosu od 200 KM. Ako je 17 ugostiteljskih radnji po 200 KM to je 3400, složit ćemo se svi da to nije suma koja će opteretiti općinski budžet. Mislim da bi zadovoljili formu, a izbjegli bi neke eventualne neregularnosti i nepravilnosti u našem radu, pa da budemo principijelni i da radimo u duhu i slovu zakona. Ja sam za ovako nešto, jer treba da potičemo privrednike i da pomažemo najugroženije grane privrede na našoj općini. U ovom momentu je to ugostiteljska djelatnost, a trebali smo možda i ranije, jer je ovo treća godina kako smo u covidu. Ja očekujem i ne želim da budem pogrešno shvaćen, ali očekujem da ćemo na narednoj sjednici Općinskog vijeća imati dopis od nekog drugog udruženja formalnog ili neformalnog. Jesam za to, pogotovo što se načelnik izjasnio da nema smetnji za isplatu ovih sredstava, da se precizno definiše taj zaključak koji će biti obavezujući za načelnika i za sprovođenje ovog zaključka.“

Selmin Karić, predsjedavajući Općinskog vijeća, je dao pauzu od 10 minuta.

Sjednica je nastavljena u 10, 55 sati.

Mehmed Mehinović, vijećnik SBiH: „Ja sam dužan da kažem da se nešto zakuhalo poslije moje diskusije. Ja nemam nikakve dileme ja ću podržati odluku u ovakvom obliku, a samo sam htio da kažem da to bude kako treba. Ovdje je opasnost za načelnika i za Vijeće, jer će ovakvih zahtjeva biti ne znam koliko u narednom periodu. Treba ljudima pomoći i treba naći načina da to ne bude do kraja godine nego da se kaže do petog ili šestog mjeseca da se vrate te naknade. Ja sam gledao koliki su prihodi od komunalnih taksi i to je značajan prihod, to je 5 % poreskih i ne poreskih prihoda. Prema tome teško se toga odreći pa makar u jednom malom dijelu. Mislim da ste uspjeli na pauzi da to riješite, ali da ne bi ko prenio, jer se sve prenosi, ja sam i za ovakvu odluku nemam nikakvih dilema, dignut ću ruku među prvima da podržim i ovakvu odluku. Želio bih da to bude u skladu sa nekim zakonom i da bude lakše i Vijeću i načelniku u budućem periodu.“

Senada Džanić, predsjednica kluba vijećnika SBB, BPS Sefer Halilović i SBiH: „Sve vas selamim i pozdravljam. Mislim da nismo trebali čekati da dođe zahtjev po pitanju istog. Svi smo se složili da ovo nisu prevelika sredstva, a znamo da pandemija korona virusa traje dvije godine. Zašto da čekamo da svi oni građani koji pokušavaju da rade na području općine Doboj Istok pišu zahtjeve, pa evo da kažemo za ovaj minimalni iznos da im se pomogne. Rekla bih svima nama, pa i načelniku, da trebamo reagovati sami, jer uistinu su sve grane privrede, sve uslužne djelatnosti ugrožene kada gledamo u ekonomskom smislu usljed pandemije korona virusa.“

Emira Karić, predsjednica kluba vijećnika SDP: „Ja isto tako razumijem iako sam zahtijevala da zaključak bude jasan, da je nemoguće, jer je čini mi se juče stigao ovaj zahtjev, da se nađe pravna formulacija kako pomoći. Ja bih rekla pomoći, a ne osloboditi taksi, jer nije popularno ići u prekršaje. Ukoliko se neki odluče da prihvate ovakvu odluku koliko poznajem pravo mogu reći da smo mi u prekršaju i Općinsko vijeće i načelnik itd. a to uvijek može potegnuti ona strana na koju se ova odluka nije odnosila. Tako da zaista moramo naći načina, odnosno mi smo na ovom kratkom sastanku rekli da to bude neka formulacija da načelnik iznađe načina, naravno neprecizna je, ali povjerovat ćemo i u što kraćem roku. Naravno da je što kraći rok maksimalno do 30 dana i da ne može kraći rok biti godina itd. Predlažem da budemo u ovim stvarima jednoglasni ukoliko možemo i ukoliko prihvatimo. Znači da ne kažemo da odluku ne prihvatamo, jer smatram da to nije zakonski pravno, ali da prihvatimo taj zaključak koji će predsjedavajući da dobro formuliše.“

Kemal Bratić, općinski načelnik: „Moram nešto dodati i nadam se da neće izazvati dodatne replike i diskusije da ne pokvarim, da tako kažem, ovu sjednicu. Ne bih se ja složio da su sve grane privrede ugrožene na našem području. Po mojim pokazateljima 2021. godina je bolja od 2019. godine. To su tačni pokazatelji, podaci iz Porezne uprave i sa tendencijom rasta. Mi smo jedna od rijetkih općina koja u jeku najveće pandemije imala otpuštenih samo 50 radnika. Znači oni koji su bili na neki način ugroženi preorjentisali su ili svoju proizvodnju ili svoj način poslovanja. Ono što znam jeste da je najveći teret i najviše štete koju evo i dan danas trpe su pretrpjeli ugostitelji. Zašto? Prvo su imali zabranu potpunog rada, dok su trgovine radile, tržišni centri radili, apoteke radile itd. i zato smatram da im trebamo pomoći. Mi smo tamo na ovom našem sastanku usaglasili da to bude ovakav zaključak i mislim da je on jedini ispravan. Zašto sam kandidirao tačku? Da nam neko ne bi rekao da čekamo mart, a možda će nekome dobro doći taj vid pomoći i možda će biti i veći od 200 KM i ne mora značiti da će biti 200 KM. Evo vi ste meni dali na neki način obavezu da iznađem načina da pomognem našim ugostiteljskim radnicima i ja ću pomoći onoliko koliko je to u našoj

moći. Veći dio sredstava, evo ova tačka koja je bila prije vezana za povećanje cijene i to je nekakva minimalna, jer najjeftiniji smo na Kantonu. Znači sva ta sredstva idu prema građanima i još dodatno i raspisujemo tender za put, za koji je imao amandman gospodin Sinanović, jer smo 25.000 dobili od višeg nivoa, a 25.000 ćemo dati iz svog budžeta. Usvojen je amandman, ja sam to obećao i ide u tom pravcu. Znači jedini ispravan način koji je u skladu sa zakonom je ovo. Mislim da je ovaj zaključak dobar i ja bih vas zamolio da svi to podržite i u što kraćem roku ja ću sa njima održati sastanak i dogovoriti ćemo dinamiku, a naravno uključiti ćemo pravobranioca i stručne službe da vidimo na koji način ćemo pomoći našim ugostiteljima.“

Senada Džanić, predsjednica kluba vijećnika SBB, BPS Sefer Halilović i S BiH: „ U potpunosti se slažem sa diskusijom kada je riječ o ugostiteljima na području naše općine. Međutim smatram i evo naglasit ću da postoji još uslužnih djelatnosti za koje sam sigurna da im je, usljed pandemije korona virusa i ekonomske situacije kakva jest, bio otežan rad i da im u tom dijelu treba pomoći. Da ne bi čekali zahtjeve i ostalih smatram da trebamo reagovati unaprijed, jer ponavljam pandemija ne traje mjesec dana već dvije godine.“

Selmin Karić, predsjedavajući Općinskog vijeća: „ Ima li još prijavljenih? Nema. Znači ovdje nije definisano usvajanje odluke samo je na dnevnom redu razmatranje zahtjeva za oslobađanje od taksi. Ja predlaže sljedeći zaključak:

- 1. Da ovaj zahtjev za oslobađanje godišnje komunalne takse Vijeće ne može prihvatiti, jer ne bi bilo u skladu sa zakonom*
- 2. Da načelnik zajedno sa rukovodstvom ovog udruženja sjedne i iznađe mogućnost na koji način i kako da se pomogne toj kategoriji poslodavaca.*

Ko je za usvajanje ovakvog zaključka?“

Glasanje: ZA – 17, PROTIV – 0, SUZDRŽANIH – 0.

Zahvaljujem se. Ovim smo iscrpili dnevni red i zahvaljujem se na prisustvu. Samo još nešto 1. marta imamo svečanu sjednicu i nakon toga imat ćemo jedan ručak sa predstavnicima bošnjačkih političkih stranaka iz Republike Srpske tako da ste svi pozvani na taj svečani sastanak.“

Sjednica je završena u 11,10 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVAJUĆI OPĆINSKOG VIJEĆA
Selmin Karić

Zapisnik je usvojen na 15. redovnoj sjednici Općinskog vijeća Doboju Istok održanoj dana 31.03.2022. godine.

U Klokotnici, dana 31.03.2022. godine

Zabilješku sačinio
Omer Hadžić, sekretar Općine